

nydergeheth. Darnach haben sie die nacht auch inn 12 gleiche tayl getaylt / Der selbigen
 stunden machen 3 ein Wach wie man list im Luciano / Livio. Davon thut auch meldung
 der heylig Lucas im 12 Capitel seiner Euangelia. Das aber die Juden diese Stunden
 gebraucht haben / vnd nicht die Nürnbergger stund / wie etlich mainen vnd schreyben / wil
 ich auß der Heiligen gesch:iffte genügsam beweren / Dann zu Nürnberg ist der Tag zu
 zeyten 8 stund lang / zu zeyten 16 stund / Bey den Juden aber ist alle zeyt der Tag Er
 sey lang oder kurz / 12 stund lang gewesen: wie dann clar ist bey Joanne im 11 Capitel /
 Sprachen zu Jesu die Junger / Master / West wolten dich die Juden staynigen /
 vnd du wilt wider dahin? Jesus antwort / Sindt nicht 12 Stunden im Tag? Auch
 ist das clärlich im Mattheo angezeit im 20 Capitel / Das Hymelreich ist gleich einem
 Hausuatter / der am morgen früe außging arbeyter zu mieten inn seinen weyngarten:
 da Ehr ains ward mit den arbeytern des taglons halben zc. Vnd ging widerumb auß
 vmb die 3 stund zc. Abermals ging ehr auß vmb die 6 vnd 9 stund vnd thet gleich also.
 Vmb die 11 Stund aber ging er auß vnd fand andre müßig stehen vnd sprach zu men /
 Was stehet jr hie den ganzen Tag müßig? Zulest stehet: vnd mürmelten etlich wider
 den Hausuatter vnd sprachen: Diese leüt haben nur ain stund gearbeyt zc. Da ist clar vnd
 offenbar das der tag nur 12 stund lang gewesen ist: vnd ist kein zweyfel ain stund ist der
 andern gleich gewesen. Also ist genügsam bewert / das diese stund nicht der Nürnbergger
 stund sint / oder Regenspürger / wie wol sie ire stund auch vom auffgang zelen. Nun ist
 noch zu beweren / das es nicht vnser stund sein / die wir in Teutschen Landen brauchen /
 von Mittag zu mitternacht / von dann widerumb zu dem mittag. Darumb irren etliche
 Prediger / die die stund des Passions vnser Erlösers nach vnsern stunden rechnen. Für
 nemlich / das sie in dem leyden vnser Herren nit von mitternacht sint gezelt worden / ist
 clar auß dem / die weyl Christus an das Creüz gehengkt ward weylt auf den Tag vnd nit
 in der nacht / als wir lesen im 18 Capitel bey Joanne / Da füerten sie Jesum von Cay
 pha für das richthaus / vnd es war früe zc. wären diese stunden von mitternacht gezelt / so
 wer der Herr ganz früe mit dem auffgang der Sonn gecreüziget / vnd doch Er / auß di
 sen Worten / erst früe für den Richterstul gefüert ward. Das nymst du auch auß dem / Die
 Sonn ware erst gangen in den Bider / vnd zu der selben zeyt gehet die Sonn auß vmb
 die 6 stund nach mitternacht in der ganzen welt. Vnd in Marco stehet im 15 Capitel /
 Vnd es war vmb die dritte stund vnd sie Creüzigeten ihn / Schaw wären das vnser
 stund / so het Er in der früe gecreüziget werden müssen: vnd auß Joanne hast du gehört
 das Er erst zu morgens früe für den richterstul gefüert ward: vnd im anfang des 15 Ca
 pitels spricht Marcus / Vnd bald am Morgen / hielten die Hohenprierster einen rhat mit
 den Eltisten.

Zekunder wil von nöten sein das ich auch bewere / das die stunden nicht vonn Mit
 tage gezelt werden im Passion vnd Euangelien. Der Euangelist Mattheus spricht /
 im 27 Capittel. Vnd von der Sechsten stund / ward ein Finsternus über das ganze
 Landt / bis zu der Neünden stund: vnd vmb die neündte stund schreyt Jesus lauth vnd
 sprach / Eli Eli zc. Marcus spricht im 15 Capitel / Vnd da es vmb die Sechste stund
 kham (das ist gleich die Mittags stund / bey vns 12) ward ein finsternus über das ganz
 Landt / bis vmb die Neündte stund / vnd vmb die Neündte stund rüefft Jesus lauth /
 vnd sprach / Eli Eli zc. Welcher wolt nun so vnuersehent sein / vnd wolt sprechen /
 das / das ein miracel oder wunderzaichen sey / das von der 6 stund zu der 9 ein finster
 nus gewesen sey / nach vnsern stunden / die wir von mittag zelen: dann vmb die sechste
 stund gehet die Sonn vnder / vnd wirdt on alle miracel vnd wunderzaichen finster die
 ganze nacht. Das findest du auch gleychförmig bey dem Heiligen Luca im 23 Capitel.